





## ENTREE

ROYALE

Faicte au Roy

En la ville de Sainct Iean d'An-  
gely le vnziesme Septem-  
bre mil six cens vingt.

*Ensemble quels ont esté les Portiques,  
Amphiteatre, Tableaux, Denises  
& Emblefmes enicelle Ceremonie.*

Et generalmente tout ce qui s'est passé  
de plus particulier tant en ladite ville  
que depuis le départ de sa Majesté de  
la ville de Poitiers jusques à son ar-  
riuée en icelle.



A PARIS,

Chez ISAAC MESNIER, rue  
des Mathurins.

1620.

Case  
F

39

.326

1620EN

THE NEWBERY  
LIBRARY



## ENTREE

ROYALE

Faicte au Roy

En la ville de S. Iean d'Angely.

*Ensemble toutes les particularitez qui se sont passées depuis le départ de sa Maesté de la ville de Poictiers iusques à ladicte ville.*

**L**Es Empereurs Romains auoient ceste coustume lors qu'apres qu'ils auoient gaigné plusieurs batailles & signalées victoires, & qu'il estoit question de faire leur entrée

A ij



dedans la ville de Rome, ils se faisoient trainer en des superbes & riches chariots; mesme quelque fois par des Lyons, demonstrent qu'ils dominoiēt toutes sortes de forces telles qu'elles puissent estre, le plus souuent par des plus beaux & vifs cheuaux blancs, & lors on abattoit vne partie des murailles de la ville selon l'ancienne coutume: & ainsi entrant en la ville de Rome, vestus de pourpre & Challamides toutes semées d'estoiles d'or, portant sur leurs chefs les courōnes des Royaumes qu'ils auoient gaignez. Se faisoient aussi porter deuant eux plusieurs Emblemes & deuises, leurs Chars estoient suivis des Roys & Princes qu'ils auoient sermontez.

Et en cēt appareil ainsi qu'ils passioient par les ruēs l'on faisoit

de tous costez des victimes, on  
respendoit par prodigalité du saf-  
fran, on laissoit aller grandes di-  
uersitez d'oyseaux pardeuât eux,  
& les lieux par où deuoient passer  
estoint de cent pas à cent pas,  
ornez de diuers portaux triom-  
phant de diuerses façons & scul-  
ptures : Et voila quelle estoit la  
façon des entrées des anciens Em-  
pereurs Romains.

Mais celle que ie veux dire auoir  
esté faicte en la ville de Saint  
Iean d'Angely, non des Empe-  
reurs Romains, mais de l'un des  
plus victorieux Roy de L'VNI-  
VERS, & le plus IUSTE, & plus  
PACIFIQUE de la Chrestien-  
té le petit mignon de DIEU,  
LOVYS XIII. le Fils aîné de son  
Eglise, lequel apres auoir reserainé  
& rendu calme son Royaume

des troubles qui sembloient s'y esmouuoir, par la sage prouidence & l'heureuse conduitte de son bon Conseil, estant party de sa bonne ville de Paris pour aller en Normandie, & de là vers la ville de Poictiers, là où sadite Majesté s'y estant arrestée tant pour faire rafraischir son Armée que pour donner ordre à ce qui restoit estre necessaire pour la plus grande pacification de son Royaume.

Sa Majesté estant donc en icelle ville l'espace de quelque trois sepmaines ou environ, apres auoir envoyé mandement à Monsieur le Duc du Mayne de le venir trouuer en ladicte ville, ce qu'il auroit fait incontinent, & seroit venu trouuer sadite Majesté en icelle ville le 9. Septembre dernier: lequel sieur Duc du Mayne



apres auoir manifesté au Roy en  
 presence de quelques Seigneurs  
 de la Cour, les fidelles obeïssan-  
 ces qu'il deuoit au seruice de la  
 Couronne, en laquelle il vouloit  
 viure & mourir. Incontinent a-  
 pres auoir pris conge de sa Maje-  
 sté & des Roynes, reprit la poste  
 pour s'en retourner en la ville de  
 Bourdeaux.

Le mesme iour sa Majesté est  
 partie de la ville de Poictiers sur  
 les deux heures apres midy, pour  
 aller coucher à Lusignan, & delà  
 droit à la ville de saint Iean d'An-  
 gely.

Peu auparauant le départ de sa  
 Majesté de la ville de Poictiers  
 estoient venus pardeuers icelle  
 quelques Deputez de ladite ville  
 pour luy faire offrande des clefs  
 de la ville & des cœurs des Habi-

rans d'icelle : Ce que sadite Majesté prenant à gretelle offrande, les assëura de sa bien-vueillance, & qu'il desiroit les aller voir sur les lieux.

Sur telle parole lesdits Deputez prindrent congé de sa Majesté & s'en retournerent en poste en ladicte ville de S. Iean d'Angely, là où estant arriué, l'on fit assemblée en l'Hostel de ville, pour arrester & donner ordre à toutes les Ceremonies qui pourroiet estre necessaires pour L'ENTREE du ROY : tellement qu'en icelle assemblée l'on arresta quelles deuoient estre les Ceremonies.

Cela estant arresté, ceux qui auoient esté Deputez du corps de ladicte ville pour donner ordre à l'appareil, manderent de tous costez des Peintres & Sculpteurs  
pour

pour expedier tant plustost les ta-  
bleaux & Denises, les Portiques  
& Amphiteatres qu'ils desiroient  
faire faire aux auenuës par où de-  
uoit passer sa Majesté, tellement  
qu'ẽ moins de dix ou douze iours  
par le bon loin & vigilence des-  
dits Deputez tout le dit appareil  
fut preparé, n'attendant que le  
iour qu'il plairoit à sa Majesté de  
faire son entrée.

Le iour estant donc arriué que  
le Roy deuoit entrer en icelle, il  
sortit hors de la ville quelque  
deux mille hommes d'vne & d'au-  
tre Religion, faisant les deux mil-  
le hommes six Compagnies, tous  
braues & bien armez, & façon de  
tres bons Soldats (& aussi que c'e-  
stoit l'esslite des plus adroits aux  
Armes quel'on peut recognoistre  
estre en icelle ville) qui firent vne



haye bordant les deux costez du grand chemin par où deuoit passer sa Majesté, de la longueur d'une grande demy lieue du pays jusques à la porte de ladite ville.

III Sa Majesté fut ressuë à la dicte porte par lesdits Deputez qui apres vne tres-humble Harangue presenterent les Clefs de ladite ville au Roy qui les receut de leurs mains & les bailla a vn Seigneur pour quelque temps, & puis les rendit ausdits Deputez.

II Sur le premier Portique d'icelle porte estoit vn tres-grand Tableau de quelque six pieds de haut, où estoit naïfucement representé le Portraict de sa Majesté, foulant aux pieds les trophées d'Armes, & tenant en sa main droite vne palme, & le chef couronné de branches d'Oliues, a

l'entour d'iceluy Tableau estoit  
posé plusieurs festons enrichis  
des Armoiries de sa Majesté, de la  
Royne son Espouse, de la Royne  
Mere, de Monsieur Frere du Roy,  
de Monsieur le Duc de Rohan  
comme Gouverneur d'icelle vil-  
le, & des Armoiries de ladite ville.

Au second Portique qui est au  
dedans de la ville y auoit quanti-  
tez d'Emblemes & Deuises ri-  
chement decorees de peintures,  
toutes sur les VERTVS, PIETÉ &  
IUSTICE de nostre tres-GLO-  
RIEUX MONARQUE, lesquelles sa  
Majesté s'arresta quelque temps à  
les considerer.

Les ruës par où deuoit passer sa  
Majesté estoient toutes tapissées  
d'un costé & d'autre, & semées  
de sable à cause du mauuais pavé  
qui est en icelle, ladicte Majesté



apres auoir receu les vœux de tous les Habitans de la ville, entre en icelle, là où il est conduit par les Suisses de sa garde, & des Archers de la garde Escossoises au logis que leldits Deputez luy auoient fait dresser à la Royalle, pendant ce toutes les rues estoient tellement remplies d'une si grande affluance de peuples, qui tous d'une vive voix cryoient **V I V E L E R O Y**, que le traint de la Cour ne pouuoit quasiment passer.

Sa Majesté estant arriuée en son Hostel, les grosses pieces de Canon qui estoient sur les tours de l'Abbaye d'Angery & sur les autres places fortes de la ville, recommencerent pour la seconde fois leur foudroyant tintamare, que l'on fit incontinent cesser à cause que l'esbranlement des

maisons & des vitres qui tom-  
boient & bleissoient le peuple qui  
passoit en icelle.

Voyla Amy lecteur tout ce qui  
s'est passé en ladicte entrée qui  
toutes-fois tiert pour assésuré qu'el-  
le revient à plus de cent mille li-  
ures à cause des sumptueuses ma-  
gnificence qui ont esté faictes en  
divers endroiets de ladicte ville  
que ie serois trop long à vous des-  
duire par le menu, qu'aux tres  
belles collations & festins qui ont  
estez faits à quelques particuliers  
Seigneurs de la Cour qu'autres  
Generaux, à cause des raretez qui  
s'y sont trouuez, & poursuivant  
le voyage du Roy jusque à son  
retour dans sa bonne ville de Pa-  
ris, j'espere te faire sçauoir toutes  
les vrayes perticularitez qui se pas-  
seront, autres GLORIEUX faits

de nostre INVINSIBLE MO-  
NARQUE LOVYS XIII. que  
Dieu par sa sainte grace nous  
vucille conseruer.

FIN.











